

Gij Dinfwngz Cauh Ceij Mbanjbajgiz

□ Godoq comz hoiz



Ranz cauh ceij guh youq henz raemx

Youq Lozyez Yen Dungzloz Cin Luzveiz Cunh Mbanjbajgiz, gij dinfwngz cauh ceij gaeuqgeq haenx vanzlij youq gizneix swncienz, gyoengqvunz mbanj neix mboujdan rox gij dinfwngz cauh ceij gaeuqgeq neix caezcienz, vanzlij rox yungh faexcuk gyangdoengh cauh'ok ceij-mbaw maenhndei.

Mbanjbajgiz ndawde miz haujlai canghcauhceij, Cangh Dwzgeiz dwg bouxswncienz dinfwngz cauh ceij ndaw mbanj neix. Ciuq Cangh Dwzgeiz lwnh, gij gisuz caeuq gij mbaek gonqlaeng gvendaengz cauh ceij Mbanjbajgiz haenx haemq fukcab, ndawde gij mbaek daeuz miz 8 mbaek. Mbaek daih'it dwg raemj faexcuk (aeu doenghgo faexcuk dangdieg guh liuh daeuz). Mbaek daihngieh dwg mboet faexcuk. Dawz gij faexcuk raemj ndei haenx coq haeuj ndaw daemz bae mboet sam ndwen nanz. Mbaek daihsam dwg swiqseuq faexcuk. Faexcuk mboet ndei liux rauz hwnjdaej caemhcaiq aeu raemx swiq seuq gij naez, uq caeuq gyamq de, liuxle cuk gyoengqde sanq yaek baenz sei bae. Mbaek daihseiq dwg daem liuhceij.

Dawz liuhceij coq haeuj ndaw doiqrin bae daem, daem liuhceij baenz suenz yinz yaek lumj naez nei. Mbaek daihhaj dwg dwkruq caeuq gya "raemxcung". Coq liuhceij haeuj ndaw "ruqcaemx" bae, coq raemx-mboq haeujbae, caemhcaiq aeu gaiqmoengjfaex gyaux, gyaux gij liuhceij ndaw ruq yinz bae. Mbaek daihroek dwg cau ceij. Aeu gij doxgaiq hongdawz cienmonz haenx guh baenz ceijmbaeq, liuxle dawz ceijmbaeq baez mbaw baez daeb coq gwnz benjfaex. Mbaek daihcaet dwg ap raemx. Daeb ceijmbaeq ndaej 1000 lai mbaw le, goemq 4 mbaw ceijro gvaq gwnz, liuxle aeu haj gaiq "benjgoemqceij" gungh naek 30 lai gaen haenx goemq gwnz, yienghneix ap ceij ok raemx. Mbaek daihbet dwg

dak hawq biengj ceij. Ap raemx okbae liux, aeu fagnip roxnaeuz "benqdakceij" faexcuk dawz doiceij baez mbaw baez mbaw biengj ok, cingjcaeq venj coq gwnz gyaq langh ceij, langh hawj ceij gag ro bae.

Seizneix, cungj dinfwngz gaeuqgeq neix ginggvaq cien lai bi nanz le, vanzlij youq ndaw Mbanjbajgiz louz miz caezcienz, neix caen dwg saeh geizheih dangqmaz.

Cien lai bi doxdaeuj, gyoengq lwglan vunz Mbanjbajgiz caemsim swncienz gij dinfwngz cojcoeng neix. Seizneix, hongsaeh cauh ceij mbouj beij gaxgonq hoengh lo, danhseih ranzranz cungj hen miz cungj dinfwngz neix, gyoengq vunz daihlaeng Mbanjbajgiz hix maj swncienz cungj dinfwngz neix.



▲ Ceij Bajgiz.



▲ Ranz cauh ceij.



▲ Daem liuhceij.



▲ Cau ceij.



▲ Ap raemx ok.



▲ Gya raemxcung.



▲ Vunz bae cam canghcauhceij.



▲ Canghcauhceij cingq guhhong.